

Comentario:

Reconocimiento mereci pa don Nelson Sprok

Pa Mercedes A.H- Monge

Cu hopi alegria mi a tuma nota cu gobierno a reconoce don Nelson Sprok, como un ciudadano ehemplar di Aruba, y sigur e ta merece esaki.

No ta secreto cu mi tin un admiracion inmenso pa don Nelson y henter su famia, y un cariño sumamente special pe, pa su señora Lucia, su yiu muher y sin duda pa dr. Jose Mario Sprok, cu ta

bibo ehemplo di su tata cu su perseverancia y lucha constante pa ser como profesional y como persona, cada dia mehor.

Unorguyodiberdadpasufamia y pa pueblo di Aruba henter di sa cu ademá cu e hoben aki ta dirigi e departamento di Cardiologia di Hospital San Juan de Dios, na Costa Rica, e tin otro funcionnan cu ta

desempeña a base di esfuerzo y recapitacion constante, cu awendia e ta tambe Master den Administracion di Hospitalnan, docente, y mucho mas, y e ta wordo considera un ehemplo den su entorno ayanan, te hasta sinti como un costaricense ehemplar.

Logicamente, mas cu nobenta porciento di e éxito di un famia cu ta crece recto y ta duna fruto ta depende di e guia cu e mayornan ta duna nan yiunan, y famia Sprok ta un ehemplo bibo di esaki, y cada dia, cu nan actonan, nan ta testimonio di con importante e famia ta como pilar di un sociedad.

Don Nelson ta un persona asina senciyu y humilde cu nunca bo ta scucha gaba su mes, ni acerca prensa pa papia riba e logronan di su yiu na Costa Rica, ta nos ta persegui Jose Mario pa haya informacion riba kico tin nobo pasobra nos sa cu e no ta keda keto.

Mi sa cu don Nelson y señora Lucia ta personanan cu un curazon sumamente noble y cu nan no ta bisa nan man robes kico nan man drechi ta haci, pero nan sa yuda nan prohimo hopi, y nan ta personanan desprendi y cu Dios den nan bida.

Don Nelson cu su caha di orgel "Nos Ambiente" ta anima y legra e curazon di nos grandinan den e diferente casnan di SABA, y unda cu e wordo pidi pa colabora boluntariamente e ta hacie te unda e por y semper e ta lanta ambiente di berdad cu su estilo cu tin su seyo personal, unico.

E mes tin un gesto hopi amable semper riba su cara mescos cu señora Lucia y pa nan caracter positivo y luchado nunca nan a doblega pa problema ni crisis economico cu na dado momento, a yega di pone otro negoshinan na Aruba cera, sino cu ketobay nan empresa Conar NV a sa di sortea obstaculonan y sigui bay dilanti te awor, cu ta den man di nan yiu muher Luskys.

Ora mi a habri corant diabierna y mi a mira riba front page su potret cu prome Minister y mi a lesa kico ta trata, mi a bira sumamente contento y a bisa "por fin!"

Mi palabranan di pabien pa Famia Sprok, cu nan sa con hopi mi kier nan. Un reconocimiento di berdad super mereci don Nelson! Hopi bendicion.